

عشق چواتی

چولی چنگ چواتی تیرے عشق نے لائی
وے میں جل جل گئی آں سارا اپنی نہ کائی

میں انجانی تیرا عشق سیانا وے
من وچ میرے کیتا ایس ٹکانہ وے
مارے رمزاں اے گجھیاں مینوں خبر نہ کائی

چولی چنگ چواتی تیرے عشق نے لائی

تیرے عشق دا جادو میرے سر چڑھ بولے
میری پھلاں جی جند پیا لکھاں وانگوں رولے
وے میں ہر ہر گئی آں تو جتوں وے ماہی

چولی چنگ چواتی تیرے عشق نے لائی

کنوں درد سناواں کون درد ونڈا وے
میرا وچھڑیا ہویا آن یار ملا وے
بھلا دس کون ماہیا ونڈے پیڑھ پرانی

چولی چنگ چواتی تیرے عشق نے لائی

سوہرے پیکے ماہیا میرے کول نہ بہندے
سب اپنے پرانے مینوں کافر کہندے
نہ کوئی سدھ بدھ رہیا مدھ ایسی پلائی

چولی چنگ چواتی تیرے عشق نے لائی

وچ راہواں تیرے دھکے دھوڈے پئی کھاواں
مینوں دس چا وے ماہی کیڑے پاسے نوں جاواں
مینوں چھڈ گئیوں کلی آپ ہو گئیوں راہی

چولی چنگ چواتی تیرے عشق نے لائی

میرا دین دھرم تیرے عشق گویا
دیکھو عقل ایمان میرے ویڑے نہ آیا
میرا قبلہ توں کعبہ توہیں ذات الہی

چولی چنگ چواتی تیرے عشق نے لائی

عشق تیرے ماہی پائیاں جد جھاتاں
بھل گئیاں ماہیا مینوں سبے صوم صلواتاں
ایسی عشق دی شمع توں تاں آن جگائی

چولی چنگ چواتی تیرے عشق نے لائی

وے میں اوگنہاری وے میں نیچ کمینی
وے توں بخشہارہ تیری ذات رحیمی
کریں معاف خطاواں رُو رُو دیواں دوہائی

چولی چنگ چواتی تیرے عشق نے لائی

شاہ رحیمؒ نوں سیوں کوئی موڑ لیاؤ
جھوک او جڑی نذیر دی ہن آن وساؤ
ہن آجا گھر ماہی سہی جائی نہ جدائی

چولی چنگ چواتی تیرے عشق نے لائی

وے میں جل جل گئی آں سارا بنی نہ کائی